

KEBUDAYAAN ISLAM

Kebudayaan Umat Islam Yugoslavia Ditindas oleh Kerajaan Tito

Tidak berapa lama dahulu, tatkala Presiden Tito dari Yugoslavia melawat Indonesia, sangat itu telah dijadikan suatu kesempatan oleh umat Islam Yugoslavia yang sedang tertindas dan banyak di antaranya sedang mencari perlindungan di luar negeri. Mereka telah berhubung dengan pertubuhan-pertubuhan Islam Indonesia dan meminta penganjur-penganjur Islam Indonesia menjadi orang tengah, menggunakan jasa baiknya supaya kerajaan Tito jangan lagi menindas umat Islam Yugoslavia dan segala hak mereka yang telah dirampas: seyoga dikembalikan. Suara rayuan umat Islam Yugoslavia itu datangnya dari “Persatuan Kebudayaan Muslimin Eropah” di Argentina, ditandatangani oleh ketuanya: Nadeem Saleh Bigufi, dan setiausaha Maria Kublai Murad. Surat yang mengharukan hati itu, sebagai jeritan pejuang-pejuang tauhid yang berada di bawah kekuasaan yang bukan Islam, telah disiarkan oleh majalah *Hikmah*, Jakarta. Patinya seperti berikut:

Besarlah harapan kami untuk mendapat pertolongan dan sokongan semangat dengan kerana Allah, yang telah menjelaskan kepada kita sekalian akan jalan-jalan yang lurus, melalui perantaraan Rasulullah, Muhammad *sallā Allāhu 'alayhi wa sallam*, dengan kitab suci *al-Qur'ān al-Karīm*, yang berisi kepercayaan dan undang-undang hukum yang kekal abadi.

Masyarakat kami Muslimin Yugoslavia terdiri daripada bangsa Irian dan kulit putih serta yang berasal dari bangsa “Slavic”, yang telah memeluk Islam dengan keredaan dan kemahuan sendiri, pada pertengahan kurun yang kelima belas. Semenjak itu hingga

akhir kurun yang kesembilan belas, kami telah berjaya menangkis serangan orang Kristian yang datang menceroboh daerah-daerah kami – “Bosnia” dan “Herzegovina”. Demikian juga telah berjaya menangkis serangan dari “Austria” dalam tahun 1938.

Nenek moyang kami telah menentang serangan-serangan Kristian yang bertubi-tubi datangnya dan telah berjaya mempertahankan kesucian Islam.

Oleh yang demikian kami berharap kepada saudara-saudara yang dihormati, sudi menjadi perantara menyampaikan rayuan kami kepada tetamu saudara-saudara, Presiden

Tito (Presiden Negara Yugoslavia), supaya beliau mengembalikan “Fakulti Teologi Islam dan Kehakiman” di Sarajevo kepada masyarakat Islam Yugoslavia, demikian juga “Badan Bantuan Keagamaan” dan meletakkanya dalam kedudukan yang sama dengan lain-lain agama, (umpamanya agama Kristian – Ortodoks) yang telah pun diberi kebebasan mendirikan Fakulti Teologi untuknya.

Kerajaan Yugoslavia sekarang yang berfaham Komunis sedang menindas rakyatnya yang beragama Islam. Masjid-masjid Islam telah dijadikan gereja-gereja Kristian Ortodoks.

Dalam lapangan kebudayaan, umat Islam Yugoslavia, penduduk daerah-daerah Vina, Herzegovina dan Benzak, mempunyai banyak lembaga dan pertubuhan. Di antaranya ialah “Gashrit” (Lembaga Peradaban Orang Islam) yang telah didirikan oleh Dr. Safit Bik Vasagi, pada tahun 1903, bersama-sama dengan Adam Aga Misik dan Raghib Bik Zahini. Pertubuhan ini telah dirampas oleh pemerintah komunis Yugoslavia dan pergerakannya dilarang.

Demikian juga “Hurriyat” (Pertubuhan Ahli-ahli Seni) yang telah didirikan pada tahun 1906 di bandar Sarajevo, telah juga dirampas dan dilarang. Begitu juga nasibnya pertubuhan untuk melawan Alcohol Trezvenost, yang telah didirikan pada tahun 1926.

Lembaga Kebudayaan orang Islam “Narudna Ozdanika” yang didirikan pada tahun 1922 di bandar Sarajevo oleh tuan-tuan Adham Afandi Mulabadi, Khamzalia Ayanoviah, Asim Bik Dogalik dan Dr.

Atif Hazikadik, telah juga diharamkan oleh pemerintah komunis Yugoslavia. “Edlier” (Badan Penanam Mayat Orang Islam yang Miskin), “Murhamiat” (Murhamah) (Badan Kebajikan Masyarakat) yang berjuang untuk kebaikan dan meninggikan darjat hidup ahli-ahli persatuannya, dan membantu keluarga-keluarga Islam yang miskin, “Jirjiliz” (Perkumpulan Orang-orang Islam), dan lain-lain badan Islam, di seluruh Yugoslavia telah diharamkan oleh pemerintah komunis.

Demikian juga bilangan Muslimin dan lembaga ekonomi di Bosnia, Herzegovina dan Zendizak, “Muslim Bank” di bandar Tisani, “Lembaga Bank Abdi Bik Frezbikivia” di Sislik, “The Muslim Bank of Credit” di bandar Tik dan cabangnya di Flibiyi, semuanya telah dirampas oleh pemerintah komunis, Yugoslavia.

Syarikat kerjasama orang Islam “Sepas” di bandar Sarajevo, “The Muslim Commercial Bank” di Turvisimi dan cabangnya di bandar Kakku, dan juga “Muslim Bank” di bandar Visoko, telah dirampas juga oleh komunis.

Semuanya itu kami berharap supaya dikembalikan dan kami rakyat Islam Yugoslavia berharap juga mendapat kebebasan bergerak menurut peraturan Islam di tanah air kami yang dikasihi Yugoslavia.

Kami umat Islam Yugoslavia, yang berjumlah dua juta jiwa sentiasa berdoa supaya hidup dan mati kami di dalam Islam.